

Nurija Agić, *BOSNA U EVROPSKIM ENCIKLOPEDIJAMA ili Hronologija krivotvorenja historijske logike*, Bosanska riječ, Tuzla 2019, 421 str.

Iz štampe je izašla knjiga *Bosna u evropskim enciklopedijama ili Hronologija krivotvorenja historijske logike* autora Nurije Agića. Ona je jedna od rijetkih knjiga koja predstavlja bibliografiju objavljenih radova iz evropskih enciklopedija u vezi s Bosnom i Hercegovinom. Knjiga je rezultat višedecenijskog istraživačkog rada autora u većim evropskim bibliotekama, a posebno u Univerzitetskoj biblioteci u Upsali, u Švedskoj.

Za svaki navod i citat u navedenim enciklopedijama autor je dao faksimil naslovne stranice enciklopedije, godinu izdanja i stranicu na kojoj se spominje termin Bosna, uz citat iz enciklopedije, kao i komentar na navedeni tekst.

Knjiga je podijeljena u više zasebnih cjelina koje čitaoca vode iz jednog historijskog perioda u drugi, koje u kontinuitetu prate ime Bosna više od hiljadu godina. Predstavljena su 72 primjerka evropskih općih enciklopedija koje u svom nazivu imaju kao temelj odrednicu „Bosna“. Enciklopedije su generalno podijeljene hronološki na dvije, a geografski na tri osnovne grupe, odnosno grupe jezika, tačnije na latinsko, germansko i slavensko govorno područje.

U uvodnom dijelu knjige *Bosna u evropskim enciklopedijama ili Hronologija krivotvorenja historijske logike* autor pojašnjava i daje slijedeće podatke:

- Pojam enciklopedije, str. 9-10,
- Historija enciklopedistike, str. 11-14,
- Značaj enciklopedija kao izvora informacija, str. 15-16,
- Enciklopedija „znanja“ kao osnov dopuštanja genocida u Bosni, str. 17-21.

Tekstovi u knjizi *Bosna u evropskim enciklopedijama ili Hronologija krivotvorenja historijske logike* odnose se na zemlju Bosnu (Bosna, Bosnia) i narod istoimene zemlje (Bosanci, sinonim Bošnjaci). To su poglavlja:

- *Romanske enciklopedije*, str. 27-80 – dati su podaci iz 13 enciklopedija,
- *Germanske enciklopedije*, str. 83-226 – dati su podaci iz 27 enciklopedija,
- *Slavenske enciklopedije*, str. 229-336 – nalaze se podaci iz 21 enciklopedije,
- *Ostale evropske enciklopedije*, str. 367-382 – predstavljeni su podaci iz šest enciklopedija.

Za sve enciklopedije navedene u knjizi *Bosna u evropskim enciklopedijama ili Hronologija krivotvorenja historijske logike* navedeni su podaci (tom

i str.) uz autorov komentar. Osim terminā zemlje Bosne i rijeke Bosne, kao i Bošnjaka, u enciklopedijama su navedeni mnogi pojmovi „bosanski“, kao i endemske vrste flore i faune s bosanskih prostora koji se redovno predstavljaju s prefiksom *bosniensis*.

Na kraju ove veoma vrijedne knjige dat je: *Rezime*, str. 383-390, *Bibliografija primijenjena u enciklopedijskim tekstovima*, str. 393-421 i *Pogovor navedenoj bibliografiji*, str. 423-424.

U poglavlju *Bibliografija primijenjena u enciklopedijskim tekstovima* autor Nuriya Agić naveo je izvore koje su koristili autori za pisanje enciklopedija, sa imenom autora, naslovom rada ili knjige, oznakom stranice, mjestom i godinom izdanja.

U *Pogovoru navedenoj bibliografiji* autor naglašava, s djelimičnim izuzetkom teksta *Enciklopedije Leksikografskog zavoda* (Zagreb, 1982), da su sve ostale navedene enciklopedije tumačenje Bosne i njene ukupne historije preuzele iz literature koja se nalazi po bibliotekama različitih institucija.

Za pisanje knjige *Bosna u evropskim enciklopedijama ili Hronologija krivotvorenja historijske logike* autor Nuriya Agić koristio se literaturom na mnogim jezicima u dugom vremenskom periodu kako bi uokvirio svoj rad i pripremio ga za štampanje. Izdavač ove knjige je Bosanska riječ iz Tuzle.

Knjiga *Bosna u evropskim enciklopedijama ili Hronologija krivotvorenja historijske logike* Nuriye Agića nezaobilazno je štivo za pisanje nacionalne historije i historije susjednih zemalja, te se preporučuje široj naučnoj i čitačkoj publici.

*Hadžija Hadžiabdić*